

- UVOD -

OMLADINSKI RESURSNII CENTAR (ORC) TUZLA; OMLADINSKA MREŽA BOSNE I HERCEGOVINE

Omladinska mreža Bosne i Hercegovine je neformalni skup vanstranačkih organizacija, grupa i osoba koje zadovoljavaju potrebe mladih u entitetima, aktivno ih uključujući u izgradnju demokratskih vrijednosti i jačanje civilnog društva. (Misija hCa Omladinske mreže u Bosni i Hercegovini, ustanovljena na radionici strateškog planiranja u Kulašima, 11. - 17. juli 1999.g) Danas mreža okuplja 130 članica i 50 pojedinca iz 62 mjesta u BiH (zadnji podatak iz januara 2011. godine, nakon revizije).

Dragi prijatelji, pred vama se nalazi **januarsko** izdanje mjesečnog informativnog biltena Omladinskog Resursnog Centra (ORC) Tuzla i Omladinske mreže Bosne i Hercegovine.

Bilten izlazi na bosanskom-srpskom-hrvatskom i engleskom jeziku. U njemu se nalaze informacije o aktivnostima Omladinskog Resursnog Centra (ORC) Tuzla, te Omladinske Mreže Bosne i Hercegovine, informacije o mjesečnim aktivnostima omladinskih organizacija i grupa - članica ove mreže, njihovi planovi za naredni period, te ostale korisne informacije (donatori, pozivi na konferencije i seminare, školarine, stipendije...).

Ukoliko želite da budete na mailing listi za naredna izdanja mjesečnog informativnog biltena ili ako imate pitanja ili sugestije, javite nam se. Mjesečni informativni bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

<http://www.omladina-bih.net>

Uživajte u čitanju!!

SADRŽAJ

Aktivnosti u januaru 2011.	2
Planovi za februar 2010.	3
Aktivnosti dijela članica mreže	4
Nove članice	14
Informacije/pozivi	16
Donatori, školarine, stipendije	19

AKTIVNOST ORC/ hCa U JANUARU 2011.

Tokom januara Omladinski Resursni Centar (ORC) Tuzla radio je na:

- **Održavanju i razvoju komunikacija i koordinacije unutar Omladinske mreže Bosne i Hercegovine** (www.omladina-bih.net). U okviru toga smo:
 - svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH (pozivi na radionice, seminare, konferencije, pozivi za projektne aplikacije, poslovi, školarine, ostale aktivnosti);
 - Održavali i redovno dopunjavali informacije na našoj web stranici www.omladina-bih.net;
 - Prosljeđivali informacije koje smo dobili od omladinskih organizacija i pojedinaca iz mreže prema vani (međunarodnim organizacijama, organizacijama u regionu, donatorima);
 - Vršili korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH.
- **Održavanju i servisiranju BH mreže Anna Lindh fondacije.** U okviru ovoga smo:
 - Shodno zaključcima sa Upravnog odbora ALF BiH (Brčko, 16.12.2010.), kontaktirali smo članice ALF BiH koje su manje aktivne u aktivnostima mreže, kako bi izvršili analizu i reviziju članica ALF BiH;
 - U ALF Mrežu BiH primili tri nove članice (UG „Šesto čulo“ Doboj, UG „Nešto više“ Sarajevo i UG „Građanski edukativni Centar“ Tuzla);
 - Imali stalni kontakt sa organizacijama koje su aplicirale za kratkoročne projekte (ALF/CFP).

Obavještenje vezano za status ALF-a a vezano na razvoj situacije u Egiptu:

Vezano za najnoviji razvoj događaja u Egiptu, obavještavamo članice ALF BiH, kao i ostale čitaoce našeg biltena da je rad sekretarijata ALF u Aleksandriji trenutno u prekidu. Pošto su telefonske linije sa Egiptom veoma limitirane, a Internet konekcija u prekidu, a i zbog sigurnosne situacije u Egiptu, direktor ALF-a, gospodin Andreu Claret je 31. januara naložio evakuaciju stranog osoblja iz sekretarijata u Aleksandriji. Šef odjeljenja za programe, Gemma Aubarell je na putu za Španiju, gdje će, u prostorijama IEMeda, glavne kancelarije ALF za Španiju, biti smješten privremeni kontakt sekretarijata ALF-a. Dobili smo i obavijest da su svi lokalni uposlenici ALF sekretarijata i njihove porodice na sigurnom. ALF će nastaviti svoje redovne aktivnosti čim to prilike dozvole. Članice ALF-a molimo za strpljenje.

- **Učešće u projektu “Održivi razvoj NVO Sektora u BiH – Mreža resursnih centara. U okviru ovoga smo:**
 - Nastavili sa prikupljanjem informacija za bazu podataka nevladinih organizacija (više informacija možete naći na sljedećem linku na našoj stranici: http://www.omladina-bih.net/RC_tuzla/). Baza podataka će nam pomoći za što kvalitetnije pružanje usluga podrške organizacijama civilnog društva u narednom period. Uvidom u postojeće baze podataka došli smo do saznanja da je veliki broj organizacija u BiH prestao sa radom, ili su im podaci nepotpuni;
 - U okviru PMG (programa malih grantova), koje finansira SIDA, izvršili smo evaluaciju projekata organizacija: Udruga Brčanskih povrtlara, PRONI Brčko, CIPP Zvornik, Citizen Kalesija i UG “Klisa” Srebrenica;
 - U okviru serije uvodnih radionica o uvođenju sistema kvaliteta u radu NVO-a i javne rasprave o mobilisanju kapaciteta na rješavanju brojnih problema građana – u Tuzli je u Kući Plamena

Mira, 25. januara održana radionica na kojoj je prisustvovalo tridesetak predstavnika nevladinih organizacija.

Uvođenje sistema kvaliteta u radu organizacija civilnog društva sve više postaje trend ne samo u zemljama regiona već i u BiH. Sistem kvaliteta u radu podrazumijeva određeni nivo standarda u radu i pružanju usluga korisnicima, što organizacije civilnog društva čini konkurentnijim na „tržištu”. U isto vrijeme raste i očekivanje građana prema nevladinih organizacijama da se aktivnije uključe u rješavanje brojnih problema. Kako bi nevladine organizacije mogle ispuniti ovu svoju ulogu moraju biti prepoznate od strane vlasti kao relevantan partner, a to onda znači uspostavljanje istinskog i pravog dijaloga kroz koji mogu biti mobilisani svi kapaciteti lokalne zajednice na rješavanju brojnih problema građana.



U sklopu realizacije programa “Održivi razvoj NVO sektora u BiH” koji finansira USAID, predviđena je podrška uvođenju i promociji sistema osiguranja kvaliteta za NVO. Cijela inicijativa je započeta još 2005. godine, osnivanjem koalicije NVO “Kvalitet.ba” koja je imala zadatak da razmotri postojeće modele osiguranja kvaliteta rada NVO i da odgovarajući sistem upravljanja kvalitetom “raširi” na što veći broj organizacija civilnog društva u BiH.

• Regionalna akcija protiv diskriminacije:

U okviru ovoga projekta, koji ORC Tuzla implementira zajedno sa partnerima: Mirovna Akcija Prilep, Makedonija, Multikultura Tetovo, Makedonija, Mladinske Inicijative Skopje, Makedonija, Omladinski klub Pod istim suncem Jablanica, BiH, ANP Gnjilane, Kosovo i Edukativni Centar Kruševac, Srbija, a pod pokroviteljstvom Norveške narodne pomoći (www.npa.org.rs), nakon održavanja debata u Bijeljini i Orašju, počeli smo pripreme za izdavanje knjižice, u kojoj će biti sadržane sve informacije iz projekta, izvještaji sa debata, kao i analiza situacije. Izdavanje i distribucija knjižice je planirano za kraj februara.

PLANOVI ZA FEBRUAR 2011.

- Nastavak rada hCa/ORC Tuzla na redovnoj distribuciji informacija omladinskim organizacijama u Bosni i Hercegovini, kao i uređivanje i distribucija mjesečnog Biltena Omladinske mreže Bosne i Hercegovine;
- Nastavak koordinacije bosanskohercegovačke mreže, u okviru Anna Lindh Fondacije;
- U okviru projekta “REGIONALNA OMLADINSKA AKCIJA PROTIV DISKRIMINACIJE” - Društveno zbližavanje, ravnopravno učešće manjina u BiH, koji naša organizacija, u partnerstvu sa organizacijama iz: Bosne i Hercegovine, Srbije, Makedonije i Kosova, a pod pokroviteljstvom Norveške narodne pomoći implementira u BiH, planiramo sve zaključke i preporuke sa održanih debata u Brčkom, Tuzli, Bijeljini i Orašju, te rezultate analize objaviti u knjižici - almanahu. Knjižica izlazi iz štampe polovinom februara.

AKTIVNOSTI ČLANICA OM BIH

UDRUŽENJE IPAK - MLADOST GRADI BUDUĆNOST PROJEKTNI URED:

Patriotske lige 10, 75000 Tuzla, BiH

Tel/fax: 035 257 474, Telefon: 035 257 097

E-mail: ipak_tuzla@bih.net.ba,

www.ipak-mgb.ba, www.mladiuakciji.ba



- **SVEČANOM DODJELOM CERTIFIKATA UČESNICIMA I KONCERTOM FRENKIJA ZAVRŠEN CIKLUS TRENINGA “LJUDI TRAŽE MIR, A MIR LJUDE”**



Program Trening iz nenasilne razrade konflikata i izgradnje mira, koji je protekle godine sprovodilo Udruženje IPAK – Mladost gradi budućnost uspješno je okončan svečanom dodjelom certifikata polaznicima edukativnih radionica. Za ovu priliku organizovan je i koncert Adnana Hamidovića Frenkija u Internacionalnom omladinskom centru IPAK-SHL u Križevićima, kod Zvornika.

Oko četrdeset mladih ljudi učestvovalo je u ovom programu, te kroz dvije faze treninga steklo znanja koja će im koristiti u daljem radu. Dvije grupe, od oko dvadeset mladih ljudi je,

prošle su po četiri dvodnevna treninga, nakon čega je formirana jedna grupa koja je zajedno učestvovala na dva napredna treninga. Svi učesnici su prisustvovali na završnoj ceremoniji i koncertu, što je bila prilika za druženje i zabavu nakon iscrpnog rada, kako za učesnike, tako i za organizatore i trenere.

Program nenasilne razrade konflikata je nešto što je zaista potrebno lokalnim zajednicama. Grupa koja je prošla niz treninga je jako dobra i vidi se da su osnažili svoje vještine komunikacije, te da su educirani da mogu uočiti konflikt. Naš cilj je bio da mladi steknu kompetencije da mogu multiplicirati stečena znanja u svojim organizacijama, odnosno lokalnim zajednicama. I naravno, mi ćemo kroz rad naše organizacije i dalje raditi na programu izgradnje mira, rekla je Lahira Sejfija direktorica Udruženja IPAK-MGB.

U protekle tri godine IPAK – MGB je intenzivno organizirao treninge i radionice za mlade, u vlastitom omladinskom centru u Križevićima i u Tuzli, na teme : Nenasilna razrada konflikta, Komunikacija i osnove komuniciranja, Timski rad, Razrada i razumijevanje konflikta, Donošenje odluka, Percepcija, Uvažavanje različitosti, Stereotipi i predrasude, diskriminacija, Identitet, Aktivizam, Suočavanje s prošlošću, Izgradnja mira. U okviru trogodišnjih treninga za mlade vještine i znanja, na gore navedene teme, usvojilo je **150 mladih** ljudi različitih sredina Bosne i Hercegovine. Sve edukacije su vodili licencirani treneri iz BiH i Srbije.



Smatram da je najvažnije što su mladi imali priliku da razgovaraju o vrlo osjetljivim pitanjima: etničkim predrasudama, nacionalnom identitetu, diskriminaciji, pravima marginaliziranih grupa, da rade na suočavanju s prošlošću što vidim kao temelj dugoročne transformacije društvenih sukoba i izgradnje održivog mira u post konfliktnim zajednicama. Učesnici su senzibilizirani za nasilje, osnaženi da ne bježe od konflikta nego da rade na njegovoj transformaciji i da u okviru svoje porodice, zajednice, radnog mjesta utiču na izgradnju pomirenja, promovišu istinu, mir, pravdu, jednakost kao osnovne ljudske vrijednosti. Iskustveno učenje doprinijelo je da mladi bolje razumiju prošlost i da preuzmu odgovornost za izgradnju budućnosti u kojoj se međuetničko nasilje nikada neće ponoviti, rekao je jedan od trenera Milan Colić.

Cilj ovog projekta je edukacija mladih aktivista kako bi stekli znanja i vještine koje će im pomoći da konfliktima pristupe konstruktivno i rješavaju ih kontinuirano na nenasilan način. Projekt „PIN-GFK“ namijenjen je aktivnim mladim ljudima sa područja sjeverno-istočne BiH (općine Tuzla, Zvornik, Sapna, Kalesija, Osmaci, Srebrenica, Bratunac, Šekovići, Milići, Vlasenica i Bijeljina). Projekat je implementiran uz podršku Ministarstva vanjskih poslova Njemačke.

• Konferencija „FINAL“

Konferencijom pod nazivom „FINAL“ završene su projektne aktivnosti u okviru projekta „USPOSTAVA MODELA I RAZVOJ PARTICIPACIJE MLADIH PODRINJSKOG REGIONA U POLITIČKIM PROCESIMA. Cilj konferencije je bio da se sastavi monitoring tim za praćenje aktivnosti i da se utvrdi plan rada nakon završetka projekta. Na konferenciji su učestvovali predstavnici političkih partija i predstavnici mladih koji su kroz dijalog razmatrali koji su najefikasnije metode za praćenje realizacije definisanih prioriteta mladih.



Prioriteti mladih su definisani i usaglašeni na ranije održanoj konferenciji pod nazivom Čisto 10, na kojoj je predstavljen i plakat sa 10 prioriteta mladih koji je potpisan od strane predstavnika političkih partija. Nakon diskusije usaglašeno je da je neophodno da u monitoring timu budu uključeni predstavnici mladih iz svih opština koje su članice Regionalne omladnske mreže za lokalni razvoj, kako bi se monitoring mogao vršiti u svim opštinama iz kojih su mladi dio mreže.

Radi što efektivnijeg i efikasnije funkcionisanja monitoring tima, učesnici konferencije su se složili da je za potrebe realizacije aktivnosti neophodno izvršiti dodatnu edukaciju tima kroz seminare iz oblasti javno zagovaranja i istraživanje javnog mjenja.



Za uspješno djelovanje u narednom periodu, predstavnici monitoring tima moraju uspostaviti saradnju sa političkim partijama iz svojih opština u cilju dvosmjerne razmjene informacija, tako što će predstavnici političkih partija dostavljati informacije o radu njihove političke partije o pitanjima mladih tj. o prioritetima mladih definisanih na konferenciji Čisto 10. Implementaciju ovog projekta podržao je Balkan Trust for Democracy.

Sve informacije o realizaciji praćenja provođenja prioriteta mladih biće objavljene na web stranici Udruženja IPAK-MGB, kao i na

Facebook stranici Ipak Mgb.

• Dan otvorenih vrata u Internacionalnom omladinskom centru IPAK-SHL

Održavanjem Dana otvorenih vrata Internacionalnog centra IPAK – SHL najavljene su aktivnosti za tekuću godinu. Protekle sedmice Centar je bio domaćin za preko osamdeset posjetitelja, uglavnom stanovnika naselja Križevići i okolnih mjesta. A za zabavni program zaduženi su bili učesnici aktivnosti IOC IPAK-SHL i učenici Osnovne škole „Desanka Maksimović“ iz Križevića.



Ovo je bila prilika da se stanovnici okolnih naselja bolje upoznaju sa radom IOC IPAK –SHL, odnosno da imaju bolji uvid u aktivnosti koje Centar nudi, rekao je Koordinator IOC IPAK-SHL Omer Muminović.

Polaznici Forum teatra i plesne sekcije u Centru su izveli predstavu za goste, a literarna sekcija OŠ „Desanka Maksimović“ izvela je niz skečeva i recitala. Dan otvorenih vrata je aktivnost koja se u IOC IPAK- SHL sprovodi svake godine .



UDRUŽENJE SANUS - PRIJEDOR

Pećani B-2, ulaz 3, 79 101 Prijedor

Tel/fax: 052 232 828, 234 846

E-mail: sanus@prijedor.com


Web: <http://www.users.prijedor.com/sanus>

Udruženje „SANUS“ Prijedor je neprofitno, nestranačko i nevladino udruženje koje na načelima tolerancije, razumijevanja i saradnje podržava aktivno učešće pojedinaca i grupa u stvaranju građanskog društva i demokratije. Edukovanjem građana kroz razne seminare, tribine, okrugle stolove i sl. pomažemo im da preuzmu aktivniju ulogu u razvoju demokratskog društva i demokratije.

Udruženje „Sanus“ aktivno je uključeno u kampanju koju sprovodi Koalicija za zaštitu rijeke Sane, a koja ima za cilj spriječiti gradnju mini hidroelektrane na izvoru jedne od najljepših rijeka u BiH.

U toku su aktivnosti na informisanju javnosti o problemu i poziv na učešće i aktivizam mještana svih opština u slivu rijeke Sane.

Naše udruženje aktivno radi i na pripremi projektne dokumentacije za buduće projekte i aktivnosti u 2011.





UDRUŽENJE „GRAĐANSKI EDUKATIVNI CENTAR“ TUZLA

Kaldrma 2, 75 000 Tuzla

Tel: 035 364 420, 035 364 422, 061 014 849, 035 364 421

E-mail: gradanski.edukativni.centar@gmail.com,

Web: <http://gradanskiedukativnicentar.blogspot.com/>

- **Muzički edukativni program AVISTA (“MEP Avista“)**



"Građanski edukativni centar" u implementaciji „Škole muzičkih umjetnosti“ 11. januara 2011. godine i zvanično je otpočeo drugi po redu selektivni ciklus kandidata na razvojni muzički edukativni program, prvi ovog tipa na području Bosne i Hercegovine i regije.

Po svom opisu “**MEP Avista**“ odgovara muzičkoj akademiji i internatu za mlade. Program je koncipiran da polaznicima omogući da na relaksirajući način bez straha od neuspjeha i negativnih ocjena završe započeti program. Program podstiče, usmjerava i ohrabruje učenike za radom i istraživanjem u oblasti muzike a na kraju dobijaju i certifikat /

diplomu – nešto na šta će biti veoma ponosni. Ciljna grupa ovog programa su djeca u dobi od 6-16 godina starosti s područja općine Tuzla.

Prema odazivu kandidata možemo zaključiti da vlada veliko interesovanje za naš program i da svakim danom raste broj interesanata za pohađanje. Iako smo odredili da broj mjesta bude limitiran, već ozbiljno razmišljamo da tu odluku promijenimo s ciljem davanja prilike što većem broju djece da se involviraju i postanu dio ovog zanimljivog muzičko-edukativnog programa.

- **Strah me je**

"Građanski edukativni centar" u koordinaciji sa građanima i građankama Tuzle i nevladinim organizacijama: UG „Zemlja djece“, Odreda izviđača „Krin“, studentskih udruženja, Vive žene, Fondacije tuzlanske zajednice, Omladinske organizacije Oko, Pokreta Front, OP Revolt, i drugih inicijator je i organizator kampanje protiv silovanja i nasilja pod parolom „Strah me je“. Kampanjom poručujemo da nećemo šutjeti i živjeti u strahu potencijalnih žrtvi, te da smo odlučni mijenjati sistem i zakone kako bi štitili nas!





SARAJEVO OPEN CENTRE
SARAJEVSKI OTVORENI CENTAR
DARJEVSKY OTKROVENY LENTR

SARAJEVSKI OTVORENI CENTAR

Tina Ujevića 19/1, 71 000 Sarajevo

Tel/fax: 033 219 797

E-mail: office@soc.ba

Web: www.soc.ba

Sarajevski otvoreni centar i Ambasada Kraljevine Španije najavljuju: IX CIKLUS ŠPANSKE KINEMATOGRAFIJE u Bosni i Hercegovini

- 31.1.-3.2.- Kulturno sportski centar, Bugojno, svaki dan u 19h
 07.-10.2. - OKC Abrašević, Mostar, svaki dan u 19:30h
 14.-17.2. - Bosanski kulturni centar, Gračanica svaki dan u 20h
 21.-24.2. - Kulturni centar, Bihać, svaki dan u 19h
 21.-24.2. - Centar za kulturu, Goražde, svaki dan u 18h
 22.-25.2. - Dom omladine, Zvornik, svaki dan u 19h

• PRVI DAN

TamnoPlavoSkoroCrno/AzulOscuroCasiNegro, igrani film, režija: Daniel Sánchez Arévalo, 2006, 105 min.
 Uloge: Quim Gutiérrez, Marta Etura, Antonio de la Torre, Héctor Colomé, Raúl Arévalo, Eva Pallarés
 TamnoPlavoSkoroCrno je stanje uma, neizvjesna budućnost, boja: boja koju ne raspoznajemo uvijek i koja se mijenja zavisno od svjetla, okoline i raspoloženja. Nakon što njegov otac doživi moždani udar, Jorge je prisiljen da preuzme posao. Zadnjih nekoliko godina je proveo teško radeći, brinući se za oca i završavajući fakultet, ali sada želi da živi po svom. Jednog dana, njegov brat koji se nalazi u zatvoru, zatraži od njega da bude otac djeteta jedne od zatvorenica koja želi preći u odjel za roditelje kako bi se na taj način riješila svakodnevnog maltretiranja sa kojim se suočava u zatvoru.

• DRUGI DAN

Labirint strasti/Laberinto de Pasiones, igrani film, režija: Pedro Almodóvar, 1982, 94 min.
 Uloge: Cecilia Roth, Imanol Arias, Helga Liné, Marta Fernández Muro, Fernando Vivanco, Ofelia Angélica
 Melodrama, komedija o Sexiliji, nimfomanskoj pop zvijezdi i Rizi Nero, homoseksualcu i sinu kralja Tirana. Jedne večeri, skrivajući se od Sadeca i njegovih prijatelja koji ga proganjaju, nastupa u klubu prerušen u pankera te susreće Sexiliju. Ovo je njegova prva heteroseksualna veza. U međuvremenu Queti, Sexilijina najveća obožavateljica, pomaže joj da se pomiri sa svojim novim životnim stilom.

• TREĆI DAN

Gradnja/En Construcción, dokumentarni film, režija: José Luis Guerín, 2000, 125 min.
 Uloge: Iván Guzmán Jiménez, Juana Rodríguez Molina, Juan López López
 U jednom od dijelova Barcelone kojem prijeti urbanistička reforma, započinje gradnja stambenog bloka. Film se manje fokusira na detalje gradnje a više na utjecaj koji gradnja stanova ima na ljude koji žive u susjedstvu, uključujući dvoje tinejdžera koji ilegalno žive u susjednoj zgradi, stranca koji traži posao za sebe i za svog sina, i mladu djevojku koja postaje zalučena jednim od građevinskih radnika.

• ČETVRTI DAN

Tapas, igrani film, režija: José Corbacho i Juan Cruz, 2005, 94 min.
 Uloge: Elvira Minguez, Ruben Ochandiano, Angel de Andres Lopez, Maria Galiana, Eduardo Blanco, Dario Paso, Alberto de Mendoza
 U okolini Barcelone isprepletano je pet priča. Strah od usamljenosti dvoje penzionera, Mariana i Conchi; nada i tuga Rachel, srednjovječne žene koja proživljava svoju ljubav preko interneta; neizvjesna budućnost Cesara i Opo; ili Lolino otkriće da postoji nešto više od njegovog bara, a što otkriva u vezi sa Mao, njegovim novim kuharom.



UG NVO „VOLONTERI & PRIJATELJI KONJICA“
 Civilnih žrtava rata 3, 88400 Konjic
 Tel.: 036 730 688, 061 610 127
 E-mail: adismuhibic@gmail.com
 Web : <http://volonteriprijateljikonjica.blogger.ba/>

• SEMINAR O SISTEMU KVALITETA NVO: POBOLJŠANJE RADA NVO

Centar za promociju civilnog društva 27. januara u Mostaru je organizovao seminar o sistemu osiguranja kvaliteta za nevladine organizacije u Bosni i Hercegovini „NVO standard sistema kvaliteta 2008.“ Prezentaciju standarda sistema kvaliteta izveli su Šefko Bajić i Dejan Žakula, projekt - menadžeri CPCD, u čemu su posebno naglasili potrebu i značaj izgradnje partnerstva bh vlasti, civilnog društva i Evropske unije u procesu evropskih integracija. Uslov opstanka nevladinog sektora jeste kvalitetan rad, tj. poboljšanje rada u svim segmentima i Centar za promociju civilnog društva za 45 organizacija organizovaće besplatno uvođenje sistema kvaliteta, a prijave se vrše do 15. februara. Seminar se održao u mostarskom Centru za kulturu, a predstavnik NVO „Volonteri i prijatelji Konjica“ bio je Mirsad Čukle.



• FANTOMSKI ZBOROVI GRAĐANA MZ TREŠANICA

Građani naših ulica (oko 200 građana) smatraju da su izbori provedeni od strane bivšeg predsjednika MZ Trešanica Halila Faladžića i sadašnjeg „predsjednika MZ Trešanica“ Velije Halilovića na „fantomskim zborovima građana“ u potpunosti ne demokratski, ne zakoniti, ne moralni i bez saradnje građana MZ Trešanica, posebno naših ulica IV Muslimanske brigade, CŽR i Luka. Na naše reagovanje od septembra 2010. godine do današnjeg dana nismo zaprimili adekvatan odgovor nadležne općinske administracije i načelnika općine Konjic na naše upućene žalbe, prigovore i otvoreno pismo načelniku općine Konjic sa argumentima.

U cilju razrješenja uočenih nepravilnosti prilikom provođenja ovogodišnjih izbora za članove mjesnih odbora, odnosno Savjeta MZ Trešanica u općini Konjic, aktivni građani Konjica odlučili su i svojim potpisima potvrdili da ovaj problem u MZ Trešanica pokuša riješiti – upućivanjem vijećničkog pitanja OO SDP BIH Konjic, odnosno vijećnici Općinskog vijeća Konjic - Klub vijećnika SDP u Konjicu.

„Ignorisan smo na svakom koraku. Lokalni medij šuti, a načelnik se nije udostojio ni da odgovori na naše otvoreno pismo. Mi ne želimo odustati i dobro je što su se vijećnici uključili, jer nadležna općinska služba mora dati adekvatan odgovor na žalbe građana i kršenje naših prava“, kaže Mustafa Kurtić, birani predstavnik građana ulice IV Muslimanske brigade.

Nakon što se utvrdi činjenično stanje, građani su predložili da se donese odluka o poništavanju izbora u MZ Trešanica za 2010. godinu i da se raspišu novi izbori pod okriljem Općinskog vijeća Konjic i nadležne lokalne administracije i uz adekvatno i javno upućen poziv građanima MZ Trešanica.

• PLAN AKTIVNOSTI ZA NAREDNI PERIOD

- Povodom obilježavanja početka 2011. godine – Evropske godine volontiranja kreirat ćemo brošuru „AKTIVNI GRAĐANI“ sa prezentacijom 11 projekata i akcija građanske inicijative u Konjicu
- Volonteri naše grupe odazvat će se organizaciji humanitarnog koncerta za majku Anelu Čosić, kojeg organizuje KUU „Sejfullah“ i druga udruženja građana, 25. februara 2011. godine

- Planirano je učešće na okruglom stolu kojeg organizuje DOP Sarajevo, na temu „Participacija civilnog društva i NVO u procesu izmjene Ustava BiH“, koji je planiran da se održi 8. februara u sjedištu Parlamenta Bosne i Hercegovine u Sarajevu.
- Planirano je učešće u radionici „Organizacija i nadležnosti pravosudnih institucija u BiH“, koju organizuje ADI Sarajevo, 3. i 4. februara 2011. godine u hotelu Hollywood, Ilidža
- Adis Muhibić, (volonter godine 2008.) učestvuje u radu višečlanog stručnog žirija za izbor najboljeg volonterskog poduhvata u 2010. godini (BHVP2010) pod stručnom organizacijom NVO Altruista Svjetlo Sarajevo
- Vrš se pripreme i konsultacije oko izbora članova Inicijativnog odbora za formiranjem Sportskog saveza općine Konjic



UDRUŽENJE KULT

Centralni ured Sarajevo (CUS)

Banjska ul. 2, 71 210 Ilidža, Sarajevo

E-mail: kult@mladi.org, www.mladi.org

Tel/fax: 033/637 290, 033 621 351

• Vlasti su izdvojile samo 2 KM po mladom čovjeku u BiH u 2010. g.

Posljednji rezultati istraživanja Udruženja KULT o problemima i potrebama mladih, primjerice, u sarajevskim gradskim općinama donose poražavajuće statistike: **64% mladih napustilo bi BiH** zauvijek ili na duži vremenski period. Kakva li je tek situacija u manjim bh. sredinama?! Nesumnjivo gora. Ovi alarmantni podaci ne trebaju čuditi: Čak i u izbornoj godini vlasti su za podršku i razvoj mladih ljudi izdvojile svega 2 KM po glavi stanovnika. Prema ranijim istraživanjima nevladinih organizacija u posljednje 4 godine vlasti u BiH su najmanje novca izdvojile za potrebe mladih, „čitavih“ 14 miliona maraka za četiri godine, što je jedva 0,05% ukupnih budžetskih sredstava.

Iako postoje entitetski zakoni koji obavezuju vlasti da podržavaju mlade usvajajući i primjenjujući strateške dokumente, tek 43% općina u BiH ima jednu takvu strategiju prema mladima. 62% općina ima službenika/ca koji se bavi pitanjima mladih, s tim da oblast „mladi“ u većini slučajeva ne doseže ni 20% njihovog radnog vremena jer se bave i drugim poslovima. Ni lokalna predstavnička vlast ne donosi pozitivne brojke: 81% općina ima komisiju za mlade u sastavu vijeća/skupštine, ali **u 49% općina komisija za mlade nije funkcionalna**. Ista općinska vijeća/skupštine usvojili su (ili nisu) budžete za podršku aktiviranja mladih: Tamo gdje postoje budžeti za mlade, u 44% oni ne prelazi 10 hiljada maraka.

Zakon o omladinskom organizovanju Republike Srpske usvojen je još 2004. g., a Zakon o mladima Federacije BiH u junu 2010. g. Oni predviđaju primjenjiva i konkretna rješenja – samo kada bi se dosljedno implementirali. Povodom promocije Zakona o mladima FBiH, Udruženje KULT je u saradnji s četiri partnerske organizacije pokrenulo promotivnu kampanju kako bi približilo Zakon svim mladima, udruženjima i nadležnim vlastima i upoznalo ih s njihovim pravima i obavezama. Tokom promocije bit će održano preko 40 javnih prezentacija Zakona, okruglih stolova i radionica s mladima, te će se zagovarati vlasti i omladinske organizacije da primjenjuju zakonske odredbe. Za mlade je pripremljen i *online* kviz, gdje mogu odgovarati na pitanja koja se tiču Zakona o mladima FBiH, te imaju mogućnost osvojiti laptop. Više informacija o Zakonu i promociji na www.mladi.org.




• **Upoznaj Zakon, osvoji laptop!**



Povodom usvajanja [Zakona o mladima FBiH](#), Udruženje KULT pokrenulo je *online* nagradni kviz pod nazivom **Upoznaj Zakon, osvoji laptop!**. Ovim putem pozivamo sve mlade da sudjeluju u nagradnom kvizu, upoznaju se sa Zakonom o mladima FBiH, te da na taj način doprinesu poboljšanju položaja mladih. U nagradnom kvizu se može sudjelovati od 11. januara do 7. marta 2011. g. Provjerite svoje znanje, naučite neke nove stvari koje vam mogu koristiti i, naravno, dobro se zabavite! Više informacija o nagradnom kvizu možete pronaći mladi.org.

• **Oprah Winfrey, Klara Cetkin, Susan B. Anthony, Frida Khalo, Indira Gandhi, Lady Diana, Šemsa-hanuma Kurtagić...**

Educirane mlade polaznice obuke KOŠNICA – jačanje mladih liderki u omladinskih organizacijama, početak 2011. g. obilježile su aktivnim radom. Sa novim idejama, vizijama i pravcima u kojima žele djelovati i razigranom maštom, one stečenim potencijalom mijenjaju svijest o tome kolika je važnost aktivnog sudjelovanja u izgradnji društva u njihovoj lokalnoj zajednici, aktivnog uključivanja u demokratskom društvu kao javnih ličnosti, te povećanja zastupljenosti žena u bh društvu. O uvođenju principa ravnopravnosti žena i muškaraca u svim oblastima društvenog života i rada, u javnoj i privatnoj sferi, djevojke su učile na radionici Ljudska i ženska prava i demokracija. Politika prema mladima i omladinski rad, radionica je koja je polaznicama pružila informacije o Zakonu o mladima, o strategiji prema mladima u njihovim lokalnim zajednicama, načinu formiranja radnih grupa za izradu strategije, upoznala ih sa Zakonom o mladima kao i nacrtala istraživanja potreba i problema mladih i kreiranje politika prema mladima. Radionice kod djevojkama rasplamsavaju kreativnost, daju im potreban impuls i usmjerenje, te stvaraju radost, entuzijazam i volju za daljim radom. Njihov timski rad na izradi zadaće jednog od prethodnih modula rezultirao je inspirirajućim plakatima njihovih historijskih liderki kao što su: Oprah Winfrey, Klara Cetkin, Susan B. Anthony, Frida Khalo, Indira Gandhi, Lady Diana, Šemsa-hanuma Kurtagić, i zanimljivim intervjuima obavljenih sa liderkama iz njihovog okruženja i to: Besimom Borić, Brigitom Lovrić, Rosom Rakitom, Adelom Merdžanić, Vildanom Selimbegović, Eminom Ganić i drugim. Plakate i intervjuue možete pogledati na kosnica.ba. ili na fejsbuk grupi KOSNICA.



• **Winter Hollydays and School of friendship**



Sretna Nova, 2011. g! Škola prijateljstva vam želi sve najbolje od srca, pogotovo dobrog zdravlja, lijepog uspjeha, mnogo sreće i ljubavi, najviše prijateljstva... Djeca su Novu godinu obilježila super zabavom! Dobra muzika (Medo Brundo, Leteći medvjedići, U šumici zeko i druge dječije pjesmice), ukusni slatkiši, veseli volonteri/ke, dječijim rukama ukrašen prostor i dobro raspoloženje, recept su za super provod! Dakle, nova godina nam je uveliko stigla, a s njom i zimski raspust. Jedna od novogodišnjih aktivnosti bila je i izrada čestitki. Na raspustu se nastavilo s igrama na snijegu. Budući da je Snješko Bjelić, koji su djeca Škole prijateljstva napravili u decembru „nestao“, dali smo se u akciju pravljenja novoga. Ovaj put ga nismo napravili s istim uspjehom kao i prošli; snijeg se dobrim dijelom, na dječiju žalost, otopio. Zato sada iščekujemo nove sniježne pahulje za nove sniježne pobjede! U januaru su djeca sa Školom prijateljstva išla na klizanje, u šetnju gradom, u Muzej grada Sarajeva, na Termalnu Rivijeru Ilidža... Naučili su nove riječi iz engleskog... A lot of them :) Greetings from all kids and Snowman...

• **Omladinski lideri/ke idu dalje: Namicanje sredstava**

Šesta radionica obuke omladinskih lidera/ki o temi Namicanje sredstava održana je u januaru, za polaznike/ce UMiD-a 5. Tokom dvodnevne radionice mladi su imali priliku upoznati se s elementima namicanja sredstava i koracima koje je potrebno preduzeti kako bi na najbolji način predstavili donatoru svoje udruženje ili projekt.

Tehnike koje su polaznici/e koristili na ovoj radionici su: Faktori uspjeha za dobivanje sredstava od bilo kojeg donatora, Osnove retorike, Kako napraviti profesionalnu prezentaciju organizacije i projekta, Kvalitetno planirani projekti, Kvalitetan zahtjev za financiranje, Izrada projektnog budžeta, Tehnika za planiranje rada. Radionice tokom obuke imaju za cilj educirati mlade o načinu pomoći matičnim organizacijama iz kojih dolaze, te ostvariti partnerstvo s lokalnim organima vlasti i krenuti u rješavanje problema i potreba. Pored toga, jedan od ciljeva jeste i osvjestiti polaznike/ce da budu aktivni građani (lideri/ke) koji pridonose razvoju cijeloga društva.



Tehnike koje su polaznici/e koristili na ovoj radionici su: Faktori uspjeha za dobivanje sredstava od bilo kojeg donatora, Osnove retorike, Kako napraviti profesionalnu prezentaciju organizacije i projekta, Kvalitetno planirani projekti, Kvalitetan zahtjev za financiranje, Izrada projektnog budžeta, Tehnika za planiranje rada. Radionice tokom obuke imaju za cilj educirati mlade o načinu pomoći matičnim organizacijama iz kojih dolaze, te ostvariti partnerstvo s lokalnim organima vlasti i krenuti u rješavanje problema i potreba. Pored toga, jedan od ciljeva jeste i osvjestiti polaznike/ce da budu aktivni građani (lideri/ke) koji pridonose razvoju cijeloga društva.

• **Novi projekti Udruženja KULT - Jednake mogućnosti za sve mlade!**

Udruženje KULT, u saradnji s partnerima Mreža mladih Hrvatske (Hrvatska), Resursni centar za razvoj ALFA, Novi Sad (Srbija) i Evropski interkulturni forum, Berlin (Njemačka), provodi projekt “*Jednake mogućnosti za sve mlade!* - projekt za povećano socijalno uključivanje marginaliziranih mladih kroz institucionalnu saradnju između vlasti i organizacija građanskog društva“. Projekt je podržala Evropska komisija u okviru IPA-inog programa. Projekt za cilj ima osnažiti mlade ljude iz Bosne i Hercegovine, Hrvatske i Srbije, zemalja u kojima se projekt provodi, da preuzmu vodstvo u zaštiti svojih prava, da utječu na donosioce odluka i poboljšaju kvalitetu svog života, prihvaćajući demokratske principe građanskog društva i ljudskih prava kao svoj životni stil. Projekt će doprinijeti podizanju svijesti kod vlasti o značaju razvoja informiranijih i učinkovitijih politika o socijalnoj uključenosti, koje se donose u kontekstu s evropskim integracijama. Ciljna grupa su mladi između 18 i 25 godina, nedovoljno zastupljene grupe, lokalne vlasti, organizacije građanskog društva, te predstavnici poslovnog sektora iz zemalja u kojima se projekt provodi.



Tokom projekta u 12 lokalnih zajednica provest će se istraživanje koje će identificirati trenutnu situaciju u oblasti politike o socijalnoj uključenosti i raspoložive kapacitete aktera koji se njome bave, definirati koje su to isključene grupe, te dati preporuke za poboljšanje situacije. Razvit će se i poredbena studija o politikama socijalne uključenosti u BiH, Hrvatskoj i Srbiji, kao i kurikulum obuke za socijalno isključene mlade. Obuka za učesnike/ce iz svih triju zemalja, kao i velika regionalna radionica za predstavnike/ce građanskog društva i službenike/ce za mlade bit će organizirane u okviru ovog projekta. Prvi korak u realizaciji projekta jeste potpisivanje memoranduma o razumijevanju s 12 općina i 12 organizacija iz sve tri zemlje u kojima se projekt provodi, koje će biti izabrane putem javnog poziva za učešće u projektu.

Osoblje KULTA, zajedno s partnerima iz Srbije i Hrvatske, radi na pripremi ovog poziva, kao i na pripremama za prisustvovanje velikom konferenciji o temi „CSOs challenge public authorities - From political commitment to active dialogue“, koji će se održati od 10. do 12. februara o. g., u Istanbulu, Turska.

NVO MDD - Muslimansko dobrotvorno društvo - Merhamet Doboj
Kralja Aleksandra 17, 74 000 Doboj
Tel: 053 226 886
E-mail: merhamet.doboj@cutuk.net
Web: www.ngo.ba

• **AKTIVNOSTI H.O. „MERHAMET- A“ DOBOJ ZA MJESEC JANUAR**

U januaru mjesecu je nešto manje aktivnosti zbog praznika. Sređuje se dokumentacija, godišnji izvještaji i sumiraju rezultati. „Merhamet“ je nastavio sa implementacijom projekata:



- „Pružanje zdravstvene zaštite socijalno-ugroženim kategorijama“,
 - „Pomoć starim i nemoćnim osobama koje žive same“,
 - Pronalaženje donatora za humanitarnu pomoć za socijalno-ugrožene kategorije.
- Predsjednica „Merhamet- a“ Doboj prisustvovala je treningu za održivi dobrobit djece u obiteljima i zajednicama, organizator World Vision.
 - Predsjednica „Merhamet- a“ Doboj, Avdić Faketa prisustvovala je radionici /prezentaciji o uvođenju sistema kvaliteta za NVO. Organizator Centar za promociju civilnog društva u saradnji sa regionalnim resursnim centrima: DON Prijedor, TOPEER Doboj, CEM Travnik i CGS Livno.
 - H.O. „Merhamet“ Doboj je obradovao socijalno ugrožene kategorije raspodjelom mesa.
 - H.O. „Merhamet“ je za 20- oro socijalno ugrožene djece pripremio školski pribor. Donator BH Telecom.



NOVE ČLANICE OMLADINSKE MREŽE BIH



UDRUŽENJE „GRAĐANSKI EDUKATIVNI CENTAR“ TUZLA
Kaldrma 2, 75 000 Tuzla
Tel: 035 364 420, 035 364 422, 061 014 849, 035 364 421
E-mail: gradanski.edukativni.centar@gmail.com,
Web: <http://gradanskiedukativnicentar.blogspot.com/>

Istorijat organizacije:

„**Građanski edukativni centar**“ je osnovan u Tuzli 2009 godine radi aktivnog djelovanja na lokalnom i globalnom nivou s namjerom animiranja građana da učestvuju u društvenom životu a u cilju unapređenja građanskog društva kroz programe promocije vrijednosti na kojem članovi udruženja i drugi mogu izgraditi svoj moralni razvoj i integritet, edukacija kroz formalno učenje i osposobljavanje kadra kao i neformalno učenje te stvaranje pozitivnih navika kod svih kategorija građana u smislu aktivnog odnosa prema društvenim događajima. „GEC“ teži da postane relevantan faktor u oblasti obrazovanja s ciljem unapređenja građanskog društva.

“Građanski edukativni centar” u svom sjedištu posjeduje odgovarajuću infrastrukturu za realizaciju svojih programskih aktivnosti. GEC u implementacije škole muzičkih umjetnosti realizira prvi i jedini razvojni Muzičko – edukativni program na prostoru države. MEP AVISTA urađen prema standardima Prep testa i EU te po svom opisu odgovara muzičkoj akademiji i internatu za mlade.

Ciljevi, zadaci i djelatnosti Udruženja:

- Djelovati i animirati građane da učestvuju u društvenom životu a u cilju unapređenja građanskog društva kroz programe kao:
- Opšte edukacije u cilju stvaranja uvjeta za otvaranje novih radnih mjesta i zapošljavanja.
- Učešće u izradi preventivnih programa zdravog društva.
- Promocija vrijednosti na kojem članovi udruženja i drugi mogu izgraditi svoj moralni razvoj i integritet .
- Edukacija kroz formalno učenje i osposobljavanje kadra kao i neformalno učenje, podsticanje kreativnog, produktivnog i svjesnog razvoja građana.
- Stvaranje pozitivnih navika kod svih kategorija građana u smislu aktivnog odnosa prema društvenim događajima te stvaranje pozitivnih navika u korištenju slobodnog vremena.
- Organizovanje pomoći siromašnim i socijalno ugroženim, te pomoći invalidima.
- Razvijanje svih vidova edukacionog rada, odgojno – obrazovnih i informativnih djelatnosti.

• **Nedim Osmanović, Diplomirani socijalni radnik, pojedinac OM BIH**

Diplomirao sa prosjekom 9,23 u rekordnom roku na Filozofskom fakultetu, Univerzitet u Tuzli, prijevremeno polagao ispite i završio fakultet prijevremeno u trajanju od 3 godine i 7 mjeseci. Stipendista Općine Tuzla, Vlade Tuzlanskog kantona, te Federalne vlade. Zlatni student i najbolji student na odsjeku za Socijalni rad od njegovog formiranja. Trenutno nezaposlen.



SARAJEVO OPEN CENTRE
SARAJEVSKI OTVORENI CENTAR
DARUJEVAČKI OTBORNI LÉHTAP

SARAJEVSKI OTVORENI CENTAR

Tina Ujevića 19/1, 71 000 Sarajevo

Tel/fax: 033 219 797

E-mail: office@soc.ba

Web: www.soc.ba

Glavni programski ciljevi:

- planiranje, podrška i implementacija procesa proučavanja važnih aspekata bosansko – hercegovačkog društva, kulture i umjetnosti, te primjena rezultata istih;
- podrška, vođenje, razvoj i organiziranje različitih oblika okupljanja i zajedničkog rada eksperata, naučnika i umjetnika kroz seminare, okrugle stolove, debate, konferencije, workshop-ove i druge aktivnosti u različitim područjima društvenih i kulturnih nauka i umjetnosti;
- omogućavanje istraživačima provođenje istraživanja u različitim oblastima društvenog života;
- promocija interreligijskog dijaloga i kulturno povezivanje;
- promocija važnosti interreligijskog, političkog, kulturnog i umjetničkog obrazovanja u osnovnim i srednjim školama, kao i univerzitetima, ali i u dijelu neformalnog obrazovanja u Bosni i Hercegovini
- stvaranje multimedijalnih prostora i organizacija aktivnosti koji se bave sa savremenom, alternativnom i marginalizovanim aspektima umjetnosti, jezika, kulture i filozofije, kao i njihovo istraživanje i promocija;
- organizacija kulturnih, ekspertskih i naučnih susreta kao jednog od načina ohrabivanja intelektualne debate i razmjene iskustava između međunarodne zajednice i bosansko-hercegovačkog društva;

Do sada realizirani projekti:

- *obuka nastavnika Kulture religija iz Zeničko-Dobojskog kantona* u okviru tri ciklusa; program finansirao Pakt za stabilnost jugoistočne Evrope (2007-2008)
- *obuka nastavnika Kulture religija iz Republike Srpske*, u svrhu probne implementacije istoimenog predmeta; (2008-2009)
- *publikacijski projekt: Kultura religija*, izdavanje knjige za nastavu ovog predmeta u Federaciji; knjiga objavljena u izdanju izdavačke kuće Sarajevo Publishing; (2008-2009)
- publikacijski projekat i projekat povezivanja: *Uvod u politički sistem Bosne i Hercegovine, izabrani aspekti*; na projektu je učestvovalo 20 mladih bh. naučnika, iz svih djelova Bosne i Hercegovine; (2008/2009)
- filmski projekt *Sedmice evropskog filma* - organizacija prikazivanja programa evropske filmske kinematografije u 12 bh. gradova, u oba entiteta i Brčko Distriktu; program je realiziran 2008. u 12 gradova, a 2009. u 10 gradova (2008-2009)
- filmski projekt *Dani evropskog dokumentarnog filma* - organizacija prikazivanja programa evropske filmske kinematografije u polju dokumentarnog filma, a povodom posljednjeg proširenja Evropske unije 2004. godine u 9 bh. gradova, u oba entiteta; (2009)
- filmski projekt *Sedmice španskog filma* – predstavljanje savremene španske kinematografije u 8 bh. gradova, u oba entiteta; u kooperaciji sa Španskom ambasadam (2009)
- izložba fotografija *Urbani fragmenti*, banjalučkog fotografa Dražena Grujića; fotografije nastale u Španiji 2008, a izložba je realizovana pod pokroviteljstvom Španske ambasade u Galeriji Roman Petrović u Sarajevu, Muzeju grada Zenice i Galeriji Q u Visokom (2009)



INFORMACIJE/POZIVI/KONKURSI



OMLADINSKI KLUB "POD ISTIM SUNCEM"

"Under the Same Sun"

Trg Oslobođenja bb. Jablanica

Tel.: 036-753-475

e - mail: okpis@bih.net.ba

1. FILM FESTIVAL - Javni poziv za autore

Omladinski klub „Pod istim suncem“ je otvorio javni poziv za autore iz regiona (Srbije, Makedonije, Hrvatske, Kosova i BiH) da učestvuju u Antidiskriminacijskom filmskom festivalu - AIFF 2011 u Jablanici (AIFF-2011). AIFF-2011 je regionalni amaterski takmičarski festival filma koji promovira antidiskriminacijske vrijednosti.

Pozivamo sve autore iz regiona da kandiduju svoje **filmove najkasnije do 10. februara 2011. god.**

Projekat se implmentira u okviru Regionalne akcije za demilitarizaciju i protiv diskriminacije. Regionalni partneri u projektu su: ORC Tuzla- BiH, Mirovna akcija Prilep- Makedonija, Akcija za mir i nenasilje Gnjilane- Kosovo, Multikultura Tetovo- Makedonija, Edukativni centar Krusevac- Srbija, Omladinske Inicijative- Skopje i NPA.

Više informacija na: www.okpis.org

2. Registracija omladinskih organizacija u Republici Srpskoj

Ministarstvo porodice, omladine i sporta Republike Srpske donijelo je Pravilnik o upisu u registar omladinskih organizacija, koji je stupio na snagu dana 16.12.2010. godine („Službeni glasnik Republike Srpske“ broj 125/10).

Prema odredbama ovog Pravilnika sve omladinske organizacije, koje imaju sjedište i koje djeluju na teritoriji Republike Srpske, dužne su da se u roku od 90 dana, počev od 16.12.2010. godine, registruju u Ministarstvu porodice, omladine i sporta Republike Srpske.

Omladinske organizacije koje ne izvrše registraciju u skladu sa gore navedenim Pravilnikom neće imati mogućnost da konkurišu za dobijanje sredstava od Ministarstva porodice, omladine i sporta Republike Srpske.

Pravilnik o upisu u registar omladinskih organizacija i prijava za upis se mogu preuzeti na prvoj stranici portala Ministarstva porodice, omladine i sporta.

Dodatne informacije možete dobiti na telefon 051/338-311 ili na e-mail: s.ugren@mpos.vladars.net.

3. Internacionalni festival amaterskog teatra u Laktašima - Konkurs za originalni dramski tekst

Na osnovu odluke Upravnog odbora, Internacionalni festival amaterskog teatra u Laktašima, raspisuje: **KONKURS za originalni dramski tekst**

Pravo učešća na konkursu imaju svi autori/ke iz bilo koje države koji se bave pisanjem amaterski ili profesionalno.



Na konkursu će biti razmatrani samo originalni, neobjavljivani, nenagrađivani i neizvođeni radovi. Kriterijumi prilikom odlučivanja žirija će biti umjetnička vrijednost i aktuelnost teme.

Konkurs je anoniman. Tekstove, u štampanoj formi (2 primjerka), slati pod šifrom. Na dramskom tekstu ne smije biti ime autora. U posebnoj koverti poslati rješenje šifre (šifra pod kojom je poslat rad, ime i prezime, adresa boravka i kontakt telefon). Isti autor može poslati najviše dva dramska teksta. Po objavljivanju rezultata, nagrađeni autor je dužan da u roku od pet dana pošalje originalni dramski tekst sa rješenjem šifre.

Rok za slanje tekstova je 01. jun 2011. Tekstovi prispjeli na konkurs se ne vraćaju.

Dodjeljuju se tri nagrade. Nagrada za prvi tekst podrazumjeva objavljivanje teksta u biltenu koji prati festival u Laktašima, praizvedbu u Laktašima ili u gradu trupe koja je osvojila nagradu za najbolju predstavu te finansijski dio u iznosu od 300 konvertibilnih maraka. Nagrada za drugi tekst je objavljivanje teksta u biltenu, tekst će biti predstavljen svim trupama koji budu uzeli učešće na festivalu i finansijski dio od 200 konvertibilnih maraka. Nagrada za treći tekst je objavljivanje teksta u biltenu, tekst će biti predstavljen svim trupama koji budu uzeli učešće na festivalu i finansijski dio od 100 konvertibilnih maraka.

Odluku o nagradi žiri donosi do 15. juna 2011. Dodjela nagrada biće upriličena 27. juna 2011. god.

Tekstove slati na sledeću adresu:

JU "Centar za kulturu i obrazovanje" Laktaši

Ulica: Karađorđeva br. 58

78 250 Laktaši

Naznaka: Prijava na konkurs za originalni dramski tekst

Sve informacije možete dobiti na: tel: 051/532-217 ili e-mail: kulturnicentar.info@gmail.com

4. Media plan - povremeni poslovi na polju istraživanja

Media plan institut povremeno provodi projekte istraživanja medija, tržišta i javnog mnijenja. Projekti obuhvataju teritoriju cijele Bosne i Hercegovine, te je potreban veći broj saradnika iz svih njenih dijelova. Ukoliko ste zainteresovani, komunikativni i odgovorni, ispunite sljedeći formular i biće vam javljeno kad počne sljedeći projekat.

Formular možete naći na web stranici www.mediaplan.ba

5. ETF program: Prilika za BiH institucije i NVO

I dalje putem PETF programa švajcarske vlade su vam na raspolaganju različiti profili osoba za dolazak na rad i pomoć u vašoj organizaciji. Napominjem da švajcarci snose sve troškove vezane za rad spomenutih osoba, avio karta za dolazak i povratak, mjesečne plate, osiguranja itd i 5 njih je trenutno u BiH. Više detalja o programu ćete naći u dokumentu u prilogu kao i CV osobe (poznavanje 4 strana jezika uz kvalitetno fakultetsko obrazovanje i radon iskustvo) koja je trenutno zainteresovana za dolazak u BiH. Teme za rad koje je intersuju su: "International cooperation / Issues such as post-conflict reconstruction and reconciliation between the people (peace-building) - subjects" dakle otvoreno za veliki broj organizacija. Radni jezik programa je engleski.

Sve organizacije koje su zainteresovane trebaju poslati na: erol.mujanovic@missioneco.org kratak opis organizacije i opis aktivnosti/projekata na kojima bi navedena osoba radila, dakle 1-2 stranice u Word-u. Više informacija: +387 33 258 270, Web: www.missioneco.org/bosnie

6. TACSO BiH Trening “Partnerstvo i umrežavanje”

Koristimo priliku da vas obavijestimo da TACSO BiH projekat (Tehnička podrška organizacijama civilnog društva) organizuje: Trening “Partnerstvo i umrežavanje”.

Mjesto i datum održavanja treninga: **Brčko, 17. februar 2011.** Rok za podnošenje prijave: **7.2. 2011.**

Specifični ciljevi treninga su:

- Razumjevanje osnovnih principa uspješne saradnje;
- Izgradnja komunikacijskih kanala između partnera u projektima i elemenata održivog partnerstva;
- Identifikovati ključne i kritične tačke u odnosima između partnera.

Tokom treninga učesnicima će biti predstavljene slijedeće oblasti:

- Kooperacija, koordinacija i kolaboracija,
- Razmjena resursa,
- Dvosmjerna komunikacija i balans između očekivanja i doprinosa partnera tokom implementacije projekata,
- Najčešće greške u komunikaciji među partnerima.

Procedura aplikacije:

Zainteresovani **predstavnici mreža i saveza OCD** trebaju dostaviti popunjeni TACSO trening formular (ne treba da prelazi 2 stranice) koji se nalazi u prilogu ovog poziva najkasnije do **7.2. 2011. 16. 00** sati na e-mail: info.ba@tacso.org sa naslovom: „Partnerstvo i umrežavanje ” zajedno sa:

- Kratkim pismom motivacije (slobodni format do 1 stranice) za učešće na treningu (dosadašnje iskustvo u procesima donošenja odluka)

Obavještenje o treninzima iz drugih oblasti koji će također biti organizovani u različitim gradovima BiH, biće postavljena na TACSO web stranici: www.tacso.org. Za dodatna pojašnjenja ili pitanja, molimo Vas da kontaktirate TACSO BH kancelariju: telefon: 033 546 351; e-mail: info.ba@tacso.org.

7. „Eurobasket 2011“ traži volontere

Popunjavanje mjesta za volontera „Eurobasket 2011“ je već započelo. Europsko prvenstvo u košarci za muškarce u 2011. godini će se održati u šest litvanskih gradova : Vilnius, Kaunas, Klaipeda, Šiauliai, Panevezys i Alytus, u periodu od 31. avgusta do 18. septembra. Po prvi put, 24 najbolja europska košarkaška tima će sudjelovati u prvenstvu.

Prema proračunu Litvanskog savjeta mladih (LiJOT), potrebno je oko 1600 volontera. Litvanski Savjet mladih je glavni koordinator procesa odabira i ljubazno potiče svakoga da se prijavi. Svatko tko je motiviran može postati volonter u „Eurobasket 2011“ samo ispunjavanjem formulara. Obrazac za prijavu zajedno s relevantnih informacija može se pronaći na linkovima:

www.eurodesk.lt i www.eurobasket2011.com.

Volonteri iz drugih zemalja su više nego dobrodošli!

Više informacija o Litvanskom savjetu mladih: www.lijot.lt ili na mail: ignas@lijot.lt , Ignas Dirma – menadžer.

DONATORI

Fondacija malih grantova: Foundation Ensemble's Small Grants Fund

Fondacija „**Foundation Ensemble's Small Grants Fund**“ osigurava finansiranje za oblasti biološke raznolikosti životinja, vode i zdravstva i održivi razvoj. Međutim, gotovo 50% ovog fonda je usmjereno na poticanje istraživanja povezanog sa biološkom raznolikošću, kao što su zaštita vrste životinja koje su ugrožene i/ili u procesu izumiranja.

Za razliku od programa Fonda, mali grantovi ove Fondacije izdvajaju 15% godišnjih sredstava za sve države svijeta, što znači da ne postoje geografski prioriteti. Male i srednje NVO-a se posebno ohrabruju da apliciraju na ovaj poziv, ali im je potrebno i da spadaju u kategoriju onoga što Fondacija finansira. Prije apliciranja pažljivo pročitajte prethodno finansirane projekte u okviru ovog Fonda na web stranici.

Maksimalni iznos novca koji će biti uloženo po projektu od strane Fondacije je 30.000 €. Fondacija može obezbijediti 50 % od ukupnog budžeta.

Postoje dvije odvojene aplikacione forme: jedna je za projekte koji se odnose na biološku raznolikost životinja, a druga forma ostale projekte.

Rok za podnošenje prijedloga projekata je 11. mart 2011. godine

Više informacija i postupku prijave, posjetite: http://www.fondationensemble.org/amicprog_fond.php.

Dragi prijatelji,

Ukoliko ste zainteresovani da se u mjesečnom informativnom biltenu Omladinskog Resursnog Centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30.-ti u mjesecu.

WEB Stranica Mreže:

sCh design
Webmaster:

Emir Delalić-Zeko - Tuzla
emir.delalic@gmail.com

web: www.omladina-bih.net
mejling lista Mreže:
posta@omladina-bih.net

Adrese za slanje vaših informacija za mjesečni bilten:
hcatuzla@bih.net.ba; orcuzla@bih.net.ba
fax: 035 258 077

hCa Tuzla
Hadži Bakirbega Tuzlića 1,
75000 Tuzla
tel / fax: 035 258 077
e-mail: orcuzla@bih.net.ba
hcatuzla@bih.net.ba

Mjesečni bilten uređuje Omladinski resursni centar - ORC Tuzla